



20. november 2020
Atassut

UKA 2020/79
Bentiaraq Bendtsen Ottosen

Nipilersortartut immiussinissamut aningaasartuutaannut 10.000 kr. tikillugu tapiissummik misiliutaasumik 2021-miit augustip aallaqqaataani atuutilersussamik Naalakkersuisut pilersitseqqullugit Inatsisartut aalajangiiffissaattut siunnersuut. Katillugu ukiut marluk ingerlaneranni 300.000 kr.-nik aningaasalerneqassaaq, Nunatsinni nipilersukkanik saqqummersitsisarnerup siuarsarnissaanik siunertalimmik. Misilittagaalersimasut nalilersuinissamut atorneqassapput avammut tunisassiornikkut kiisalu eqqumiitsuliornikkut siuariarsimanermut sunnuteqarsimanersut.

(Inatsisartunut ilaasortaq Aqqalu C. Jerimiassen, Atassut)

Aap, nipilersortartut siorna ukiakkut nunami inuussutissarsiornerup siuarsarnissaanut ilanngunneqarput aningaasanik qinnuteqarsinnaalerlutik. Taakkuli aatsaat projektinut annertuunut sulianut, kiisalu aatsaat CVR-eqaqqaarnikkut qinnutigineqarsinnaasut.

Aap, nipilersortartut aningaasarpaalunnik kulturmidlimut aamma qinnuteqarsinnaapput. Taakkuli qinnuteqarfigissallugit ajornangaarmat qaqutigorujussuaq tassanngaanniit nipilersortartut taperneqartarput.

Koda nunatsinni ilaasortaminut saqqummersitserusullutik qinnuteqartunut ukiumut 100.000kr-nik tapiisarloq, qinnuteqartulli amerlangaarmata amerlanerpaat itigartarput. Annerpaamillu 20.000kr-nik taperneqarsinnaasarlutik. Takutiinnarpaalu taamaattunik qinnuteqarfiusinnaasunik amigaateqavissortoqartoq. Suliarmi aallartinneqarsinnaanngilaq aningaasarpassuaateqanngikkaanni.

Nunatsinnili nipilersortartorparujussuupput aallartisartut, nammineq immiuserusuttut, erinaatillit, digitaliusumillu saqqummersitserusuttut. Taakkulu pisariaqartitsipput annertunngitsumik aningaasanik qinnuteqarfigisinnaasaminnik. Amerlaqaat erinaateqarlutik taamaallaallu 10.000kr-15.000 missaannaanik amigaateqartut sumiiffiminni angerlarsimaffimmi immiussisarfiutilimmut immiuserusuttut, immiussisumut akiliutissaminnik.

Atassummiit pingaartipparput kikkuguttaluunniit suliarpullu suugaluarpalluunniit suliaq tamakkiisoq tapiissutaannarnik ingerlanneqassanngitsoq. Taamaattumillu uani siunnersuummi pingaartinneqarpoq sukkaasumik, ajornanngitsumik, annikitsumillu qinnuteqarfiusinnaasumik pilersitsinissaq. Tassaavorlu massakkumiit siammasinnerujussuarmik amerlanerusuniillu qinnuteqarfiusinnaalertussa.

Uanilu misiliutaasumik qinnuteqarfissatut isikkulerlugu siunnersuut suliarineqarsimavoq nipilersortartut amerlanerpaat periarfissikkusullugit, sinerissami nipilersortartorparujussuit nuummukaqqaanngikkaluarlutillu immiusserusuttunik, sumiiffiminni immiussisartunik suleqateqarlutik saqqummersitserusuttunik.

Arnaq utoqqasaanngortoq erinaateqarluni saqqummersitserusuttup amigaatigai 20.000kr-nit saqqummersitsinissaminut, immiussisumut akiliutissaminik. CVR-qanngilaq nunamilu siuarsaanermut qinnuteqarfiusinnaasumut qinnuteqarsinnaanani, nalunngilaalu kulturmidlinut qinnuteqaralaruni itigassalluni qinnuteqartut nipilersortartut tamangajammik itigartarmata. Kodamut qinnuteqaralarpoq, qinnuteqartulli amerlangaarmata, saqqummersitserusuttut amerlangaarmata, taamaallaat 5.000-mik iluatsitseqqatarluni. Una siunnersuut periarfissaalluassagalarpoq.

Bandi rockimik sakkortuumik saqqummersitsisartut nuannarineqarluartullu, saqqummersitseqqikkusukkaluarlutik ukiuni arlariinni kulturmidlinut qinnuteqaralarlutik itigartuarsimallutik kiisami taperneqarput, pitsaasumillu nunanut allanut unammillersinnaalluarmik saqqummersitserusullutik sulii 10.000kr-nik amigaateqarput nipigissaallammammik international standard atorlugu masteriliorsinnaasumik sulisitserusullutik suliaq naammassissappat. Tassa aamma una siunnersuut periarfissatsialaassaaq.

Avannaani nunaqarfiit ilaanni rappertartoq piginnaanilik nipilersuusiaminik saqqummersitserusulluni angerlarsimaffimmini qarasaasiakkut immiussisartooq nalunngisani aperivaa immiussisorisinnaanerlugu. Taamaallaallu immiussisoq 8.000kr-nik akilerneqarusulluni. Aamma periarfissatsialak.

Nipilersoqatigiit nuannarineqarluartut nutaaliortullu nammineerlutik immiusserusullutik aalajangerput, angerlarsimaffiminni immiussisutunik ukiut arlallit ingerlaneranni nipilersoqattaarlutik katersinikuugamik. Kodamiit taperneqareersimapput 10.000 kr-nik, sulilu amigaatigivaat 12.000 kr-it sapaatip akunnera studiamik ineeqqamik nipiliorfiusinnaasumik attartorlutik tumerparpaat immiukkusukkamik. Kulturmidlinut itigareeramik, taavalu nunatsinni nipilersortartut CVR-eqaralarunilluunniit nipilersorfigisaminniit akissarsiniarlutik CVR-tik atoqqusaaneq ajormassuk, allarpassuartulli aalajangersimapput CVR normoqarusunnatik. Taamaattumillu nunami siuarsaanermut tapiissut qinnuteqarfigisinnaanagu.

Kujataani arnaq erinagissoq allap erinniaanik atuilluni saqqummersitserusuttoq. Periarfissinneqarpoq immiussisarfinni immiussinissaminut, kulturmidlinut itigareerluni, cvr-eqarnanilu, namminerlu erinaatiginnginnamigit Kodamiit itigarsimalluni, immiussisarfiup akiliigallarnissaminut periarfissippaa, kisiannili nammineerluni aamma akileeqaatanissaanik kissaateqarluni. Aamma periarfissatsialaalerpoq una siunnersuut atussallugu. 10.000kr annertunngikkaluartut iluaqutaalluartaammata.

Eqqaamassavarpummi taanna siorna nunami siuarsaanermut tapiissut periarfissanngornikummat pitsaasoq, nipilersortartut nunatta avataanut nittarsarusuttunut, angalarusuttunut, immaqalu nunarsuarmi iluatsitsillutik tusaamaneqalernissaminnut aqutissaq. Uanilu siunnersuut nunatsinni

nipilersortartorparujussuarnut, erinniortunut, taalliorunut, sineriallu tamakkerlugu nammineq saqqummersitserusuttunut oqilisaasseqataasussaammat.

Nunatsinni nipilersortartorparujorujussuit saqqummersitserusupput, nammineq akileeqataarusupput, pisariaqartitsippulli ajornanngitsumik annikitsumilluunniit iluaqutaasinnaasumik taperneqarnissaminnik. Nipilersortartuunermi inuussutissarsiutigissallugu nunatsinni akilersinnaanngingajappoq, nutaavissuillu suli ilisimaneqalinngitsut nipilersoqattaarnikkut katersisinnaanngillat immiussinissaminnut.

Nipilersortartut ilisimaneqarluareersut, pitsaasumillu suliaqarusuttut annertuumik taperneqarnissaminnik pisariaqartitsipput. Taamaattorli aamma pisariaqartitsipput qaavatigut annikitsumilluunniit taperneqaqqissinnaanissartik suliap naammassivinnissaa qulakkeerumallugu.

Tapiissutinillu eqqartuitilluta, ilisimalluaqqissaartariaqarparput, nunatsinni tunniussaqaarnerpaarpaasut pilliuteqarnerpaarpaallu ilaat tassaammata nipilersortartut. Inuunertik tamaat sungiusarnikut, inunnguuseralugu erinniornikkut taalliornikkut nipilersornikkullu piginnaasallit, akissarsiaqarpiaratik tusarnaartitseqattaaginnavissut, unnuaanakkut suliuartut, uagutsitullu akileraartuartut, inupparujussuarnik sulisitseqataasut.

Takorluulaartigumi, nipilersortartup nipilersornini inuussutissarsiutigisinnaanngikkaa, inuppassuarnik sulisitsivoq. Ullut tamarluinnaasa radiokkut tv-kkullu nipilersugaat tusartuarpagut, ilami takorluulaartigu ulloq ataasiinnarluunniit nipilersukkamik tusaasaqanngikkaluarutta, inuuneq qanoq imaarutsigissagaluarnersut uulikullaatigiinnarsinnaavarput.

Kalaallit nipilersugarpassui internetikkut, youtubekkullu tusarnaartuarpagut, katillugit miliuunilikkaanik tusarnaarneqartartut, ataasinnguamilluunniit erinniortoq, taalliorunut, nipilersortorlu aningaasanik takusaqarneq ajorpoq. Aali tamatta tamavitta qaammatit tamarluinnaasa internetimut akiliuteqartartugut. Nipilersortartumummi annerusumik utertitsisariaqalerpugut.

Nipilersortartumut aningaasaq annertunngikkaluartoq isumalerujorujussuuvoq. Taamaammat una siunnersuut Atassummiit tapersingaarpaput. Aningaasarparujorujussuarnik naleqanngikkaluartoq, misiliinerulli nalaani inuussuttorpassuit, nipilersortartorpassuillu periarfissamik atorluaasinnaalissapput, immiussarpassuarnillu piviusunngortitsinissamut, uagut qulaaniit nipilersortartut aningaasarsiutigiinnarnatigit, aamma akeqanngingajattumik tusarnaarujuuginnarnagit utertitsiffigilaartigit. Massakkullu sineriak tamakkerlugu periarfissaq nutaaq, sumiiffimmi immiussisinnaanissaq nutaaq, immiussisartut aamma saniatigut suliaqarnerulernissaat pillugu.